



Republika e Kosovës
Republika Kosovo - Republic of Kosovo
Kuvendi - Skupština - Assembly

Ligji Nr. 04/L-069

PËR TË HUAJT

Kuvendi i Republikës së Kosovës;

Në bazë të nenit 65 (1) të Kushtetutës së Republikës së Kosovës,

Miraton

LIGJ PËR TË HUAJT

KREU I
DISPOZITAT E PËRGJITHSHME

Neni 1
Qëllimi

Ky ligj rregullon hyrjen në territorin e Kosovës, daljen prej saj si dhe qëndrimin e të huajve në Republikën e Kosovës.

Neni 2

Fushëveprimi

1. Dispozitat e këtij ligji janë të zbatueshme për të huajt, për aq sa statusi i tyre nuk është i rregulluar me dispozita të tjera ligjore apo me marrëveshje ndërkombëtare të nënshkruara nga Republika e Kosovës.
2. Dispozitat e ligjit për të huajt nuk janë të zbatueshme për të huajt për aq kohë sa statusi i tyre rregullohet me ligjin për statusin, imunitetin dhe privilegjet e misionëve diplomatike dhe konsullore, personelit të tyre, të pranisë ndërkombëtare ushtarake dhe personelit të tyre në Republikën e Kosovës.

Neni 3

Përkufizimet

1. Shprehjet e përdorura në këtë ligj kanë këtë kuptim:
 - 1.1. **I huaj** - personi i cili nuk është shtetas i Republikës së Kosovës;
 - 1.2. **Ministria** - Ministria përkatëse të Punëve të Brendshme;
 - 1.3. **Qendra** – Qendra e pranimi për të huaj.

Neni 4

Përparësia e shtetësisë

I huaji, i cili posedon me shumë se një shtetësi, konsiderohet shtetas i atij shteti që i ka lëshuar dokumentin e udhëtimit dhe më të cilin ka hyrë në Republikën e Kosovës.

Neni 5

Kushtet për hyrjen në Republikën e Kosovës

I huaji mund të hyjë dhe të qëndrojë në territorin e Republikës së Kosovës vetëm me dokument të vlefshëm udhëtimi në të cilin është shënuar viza apo leje qëndrimi, përveç nëse me dispozitat e këtij ligji, me vendim të qeverisë apo me marrëveshje ndërkombëtare nuk parashihet ndryshe.

Neni 6

Liria e lëvizjes

1. Çdo person me qëndrim të ligjshëm në territorin e Republikës së Kosovës, gëzon të drejtën e lëvizjes së lirë dhe zgjedhjes së lirë të vendbanimit në tërë territorin e Republikës së Kosovës.

2. Lëvizja e të huajve brenda territorit të Kosovës mund të kufizohet vetëm në përputhje me ligjin dhe vetëm në atë shkallë që është e domosdoshme, me qëllim të:

- 2.1. mbrojtjes së interesave vitale të sigurisë kombëtare;
- 2.2. parandalimit të kërcënimeve serioze lidhur me sigurinë dhe rendin publik;
- 2.3. parandalimit të kërcënimeve serioze kriminale;
- 2.4. parandalimit të kërcënimeve serioze lidhur me shëndetin ose moralin publik;
- 2.5. parandalimit të kërcënimeve serioze lidhur me të drejtat dhe liritë e të tjerëve.

Neni 7

Respektimi i ligjit

I huaji duhet të respektoj ligjet dhe rregulloret, përfshirë aktet nënligjore dhe vendimet e organeve shtetërore gjatë qëndrimit dhe lëvizjes së tij në Republikën e Kosovës.

Neni 8

E drejta për asocim

1. I huaji mund të formoj asociacione në pajtim me legjislacionin në fuqi.
2. Të huajit nuk i lejohe formimi i partive politike.

Neni 9

Rregullat e procedurës

Nëse nuk është e rregulluar ndryshe me këtë ligj, procedura për të huaj do të jetë në përputhje me ligjin për procedurën administrative dhe ligjet tjera përkatëse.

KREU II

DOKUMENTET E UDHËTIMIT

Neni 10

Dokumenti i huaj i udhëtimit

Dokument i huaj udhëtimi nënkupton dokumentet e udhëtimit të lëshuara nga shtetet e huaja si: pasaporta personale apo familjare, dokument i udhëtimit grupor, pasaporta diplomatike, pasaporta zyrtare, apo dokumente të tjera udhëtimi të lëshuara sipas marrëveshjeve ndërkombëtare.

Neni 11

Dokumentet e udhëtimit për të huajt të lëshuara nga Republika e Kosovës

1. Dokumentet e udhëtimit për të huajt, të lëshuara nga Republika e Kosovës janë:
 - 1.1. dokumenti i udhëtimit për të huajt;
 - 1.2. fletudhëtimi për të huajt;
 - 1.3. dokumenti i udhëtimit për refugjatë;
 - 1.4. dokumenti i udhëtimit për persona pa shtetësi.
2. Procedura e lëshimit të dokumenteve të udhëtimit për të huaj sipas këtij neni rregullohet me akt nënligjor të nxjerrë nga Ministria.

Neni 12

Lëshimi i dokumenteve të udhëtimit për të huajt

1. Dokumenti i udhëtimit për të huajt mund t'i lëshohet personit i cili nuk është shtetas i Republikës së Kosovës, sipas kushteve të parapara me këtë ligj dhe me Ligjin për azilin.
2. Fletudhëtimi për të huaj lëshohet nga ministria.
3. Dokumentet e udhëtimit për të huajt lëshohet me afat vlefshmërie deri në pesë (5) vjet.

Neni 13
Lëshimi i fletudhëtimit për të huajt

1. Fletudhëtimi për të huaj i lëshohet të huajt i cili nuk posedon dokument të vlefshëm udhëtimi nëse:

1.1. i është marrë shtetësia e Republikës së Kosovës në përputhje me dispozitat e Ligjit për shtetësinë;

1.2. ka humbur dokumentin e udhëtimit apo në ndonjë mënyrë tjetër ka mbetur pa të, ndërsa shteti shtetas i të cilit është nuk ka mision diplomatik gjegjësisht zyrë konzullore në Republikën e Kosovës e as interesat e tij nuk ka kush t'i përfaqësoj nga një shtet tjetër për dalje jashtë vendit.

2. Fletudhëtimi mund t'i lëshohet të huajt nëse për këtë ekzistojnë shkaqet e arsyeshme me pëlqimin e ministrisë.

Neni 14
Mos lëshimi dhe sekuestrimi i dokumentit të udhëtimit për të huaj

1. Dokumenti i udhëtimit për të huaj nuk i lëshohet të huajt:

1.1. kundër të cilit zhvillohet procedura penale, përveç nëse ekziston pëlqimi i organit shtetëror i cili udhëheq procedurën;

1.2. cili është i dënuar me burg ose dënim me të holla, përderisa nuk e vuan dënimin ose paguan dënimin me të holla;

1.3. cili nuk e ka të rregulluar obligimin e pasurisë së patundshme që i ka takuar, për të cilën ekziston kontesti gjithëpërfshirës i titulluar, me kërkesën e gjykatës kompetente;

1.4. nëse këtë e kërkojnë shkaqet e mbrojtjes së rendit juridik, sigurisë kombëtare apo shëndetit publik, në pajtim me procedurat dhe garancat të përcaktuara me ligj.

2. Dokumenti i udhëtimit për të huaj mund të sekuestrohet në bazë të arsyeve të përcaktuara në këtë nen.

3. Ankesa nuk ka efekt pezullues. Dokumenti i udhëtimit do të mbahet për aq gjatë sa ekzistojnë arsyet e sekuestrimit.

KREU III

VIZAT

Neni 15

Lëshimi i vizave

1. Viza është aprovim për hyrje dhe qëndrim jo më të gjatë se nëntëdhjetë (90) ditë apo transit përgjatë territorit të Republikë së Kosovës.
2. I huaji i cili është shtetas i shtetit për të cilin kërkohet vizë është i obliguar ta siguroj vizën para hyrjes në Republikën e Kosovës.
3. Bazuar vetëm në vizë i huaji nuk mund të sigurojë punë me pagesë në Republikën e Kosovës.
4. Vizat i lëshon misioni konsullor i Republikës së Kosovës, ose organet tjera që autorizohen nga Qeveria e Republikës së Kosovës.
5. Para lëshimit të vizës, misioni konsullor apo zyra konsullore ose organet tjera që autorizohen nga Qeveria e Republikës së Kosovës, janë të obliguara të marrin pëlqimin paraprak të ministrisë përkatëse.

Neni 16

Vlefshmëria e vizave

1. Viza i lëshohet të huajit i cili posedon dokumentin e vlefshëm të udhëtimit.
2. Viza lëshohet në afat vlefshmërie e cila duhet të jetë më e shkurtë se sa afati i vlefshmërisë së dokumentit të udhëtimit.

Neni 17

Llojet e vizave

1. Llojet e vizave janë:
 - 1.1. viza hyrëse;
 - 1.2. viza transite;
 - 1.3. viza transite-ajrore;
 - 1.4. viza grupore.

Neni 18

Viza hyrëse

1. Viza e hyrjes lëshohet për një apo më tepër hyrje në Republikën e Kosovës.
2. Viza e hyrjes lëshohet me afat vlefshmërie deri në një (1) vit.
3. Qëndrimi i pandërprerë, gjegjësisht zgjatja e përgjithshme e qëndrimeve të njëpasnjëshme të huajit me vizën e hyrjes në Republikën e Kosovës, nuk mund të jetë më gjatë se nëntëdhjetë (90) ditë, në fazën kohore prej gjashtë (6) muajsh duke llogaritur nga dita e hyrjes së parë.
4. Nëse këtë e kërkojnë nevojat humanitare, arsyet serioze profesionale dhe personale, vizën e hyrjes për një hyrje dhe qëndrim deri në pesëmbëdhjetë (15) ditë e lëshon organi kompetent për kontrollin e kalimit kufitar.

Neni 19

Viza transite

1. Viza transite i lëshohet të huajit për një, ose më tepër udhëtime të veçanta nëpërmjet Republikës së Kosovës.
2. Viza transite lëshohet në afat vlefshmërie deri në gjashtë (6) muaj.
3. Në bazë të vizës transite i huaji mundet me rastin e çdo udhëtimi të qëndroj në Kosovë më së gjati pesë (5) ditë.
4. Viza transite i lëshohet të huajit i cili argumenton se e ka hyrjen e siguruar në shtetin e destinimit.
5. Nëse këtë e kërkojnë nevojat humanitare, profesionale, dhe ato personale serioze, vizën transitore për një transit mund ta lëshojë organi kompetent në pikën e kalimit kufitar.

Neni 20

Vizat transite-ajrore

1. I huaji i cili gjatë transitit-ajror në aeroportin e Republikës së Kosovës, nuk e lëshon hapësirën transite-ajrore nuk i kërkohet viza.
2. Përjashtimisht nga paragrafi 1. i këtij neni, bazuar në nenin 6 të këtij ligji Qeveria e Kosovës mundet që shtetasve të huaj të shteteve të caktuara t'i kërkojë viza transite.
3. Të huajit i lëshohet viza transite-ajrore për një apo më tepër kalime nëpërmjet hapësirës transite-ajrore me ç'rast të çdo kalimi transit mund të qëndrojë më së shumti njëzetekatër (24) orë në zonën e caktuar të aeroportit.

Neni 21

Viza grupore

1. Viza grupore i lëshohet grupit prej pesë (5) deri në pesëdhjetë (50) persona për një hyrje apo transit nëpër territorin e Republikës së Kosovës.
2. Viza grupore mund t'i lëshohet edhe grupit me numër më të madh të personave, nëse ka të bëjë me grupet e organizuara turistike të cilët në Republikën e Kosovës vijnë në bazë të marrëveshjeve ndërkombëtare.
3. Në bazë të vizave grupore për një hyrje në shtetin e Kosovës mund të qëndrohet më së tepërmi tridhjetë (30) ditë.
4. Nëse është në interes të Republikës së Kosovës me vlerësimin e institucionit përkatës qeveritar, vizën grupore e lëshon organi kompetent për kontrollimin e kalimit kufitar.

Neni 22

Procedurat për lëshimin e vizave

Procedura dhe mënyra e lëshimit të të gjitha llojeve të vizave nga neni 17 i këtij ligji rregullohet me akte nënligjore.

Neni 23

Vazhdimi i vizave

1. Viza nuk mund të vazhdohet.
2. Përjashtimisht nga paragrafi 1. i këtij neni viza vazhdohet në raste urgjente si: humanitare, profesionale apo shkaqe personale.
3. Kërkesa për vazhdimin e vizës sipas paragrafit 2. të këtij neni parashtrohet pranë organit kompetent i cili vendos për kërkesën e parashtruar.

Neni 24

Mos lëshimi i vizave

1. Viza nuk lëshohet nëse :
 - 1.1. ekzistojnë shkaqet nga neni 30 i këtij ligji;
 - 1.2. i huaji personalisht nuk i përgjigjet ftesës së misionit diplomatik respektivisht zyrës konsullore.

2. Përfshihet nga paragrafi 1. i këtij neni, viza i lëshohet për shkaqe humanitare nëse kjo është në interes të Republikës së Kosovës apo në pajtueshmëri me marrëveshje ndërkombëtare.

Neni 25

Kompetencat e organit për kontrollin e kufirit shtetëror

1. Zyrtari policor kufitar vendos që të huajit t'i lejohet hyrja vetëm në kalimin e caktuar të kufirit.
2. Zyrtari policor kufitar, shkurton afatin e vizës nëse e verifikon që i huaji nuk posedon mjete të mjaftueshme për tu mbajtur gjatë kohëzgjatjes së vizës.
3. Zyrtari policor kufitar anulon vizën nëse verifikon ekzistimin e shkaqeve nga neni 30 i këtij ligji.
4. Anulimi i vizës bëhet me vendim të formës së shkruar. Kundër këtij vendimi mund të ushtrohet ankesa.

Neni 26

Obligimet e transportuesve

1. Transportuesi mund ta sjell të huajin në pikën e kalimit kufitar nëse i plotëson kushtet për hyrje në Republikën e Kosovës.
2. Nëse të huajit i është refuzuar hyrja në Republikën e Kosovës, transportuesi që e ka sjellë atë në kufi, duhet që me kërkesën e organit për kontrollin e kufirit, t'a kthejë të huajin në shtetin nga i cili ka hyrë, në shtetin ku dokumenti i të huajit është lëshuar, apo në ndonjë shtet tjetër që është i gatshëm ta pranojë atë.
3. Nëse transportuesi nuk mund ta kthejë të huajin nga Republika e Kosovës në pajtim me paragrafin 2. të këtij neni, duhet që menjëherë dhe me shpenzime e tij të sigurojë transportues tjetër.
4. Transportuesi i cili e ka sjellë të huajin në kufirin shtetëror apo në territorin e Republikës së Kosovës, në kundërshtim me paragrafin 1. të këtij neni, duhet të paguaj shpenzimet e akomodimit dhe kthimit prapa të të huajit.
5. Detyrimet që rrjedhin nga ky nen duhet të zbatohen edhe ndaj transportuesit që bart të huajin në kufirin shtetëror ose brenda territorit të Republikës së Kosovës, i cili është duke kaluar transit ose të cilit i është refuzuar transporti i mëtutjeshëm nga transportuesi tjetër ose të cilit i është refuzuar hyrja në shtetin e destinacionit dhe është kthyer në Republikën e Kosovës.
6. Organizatori i udhëtimeve turistike apo atyre të punës në Republikën e Kosovës, është i obliguar që për të huajt të cilëve i është ofruar shërbimi përkatës, t'i mbulojë shpenzimet e

largimit nga Republika e Kosovës, nëse të huajt i është ndaluar hyrja apo huaji largohet me dhunë nga Republika e Kosovës dhe nëse këto shpenzime i huaji nuk mund t'i mbulojë vetë.

KREU IV

HYRJA E TË HUAJVE NË REPUBLIKEN E KOSOVËS DHE DALJA PREJ SAJ

Neni 27

Hyrja në Republikën e Kosovës

1. Konsiderohet se i huaji ka hyrë në Republikën e Kosovës atëherë kur ai ka kaluar kufirin shtetëror, gjegjësisht kur ka kaluar vendin ku bëhet kontrolli kufitar.
2. Mbajtja e të huajve në hapësirën transite në aeroport dhe mbajtja e tyre në pikat e kalimit kufitar nuk nënkupton hyrjen në Republikën e Kosovës.

Neni 28

Kontrolli në kufi

1. Personat që hyjnë në Republikën e Kosovës apo dalin nga Republika e Kosovës i nënshtrohen kontrollit në kufi.
2. Zyrtari i policor kufitar për kontrollin e kufirit shtetëror mund por nuk kufizohet të kërkoj nga i huaji të dëshmoj shkaqet të cilat vërtetojnë qëllimin e hyrjes në Republikën e Kosovës.

Neni 29

Hyrja pa dokument të udhëtimit

1. Nëse i huaji vjen për vizitë turistike apo afariste në Republikën e Kosovës dhe nuk posedon dokumentin e vlefshëm të udhëtimit, siç parashihet në nenin 5 të këtij ligji, zyrtari policor kufitar i lëshon lejen për kalimin e kufirit, në bazë të dokumentit që dëshmohet identiteti i të huajt, të cilin e ka lëshuar shteti i të cilit i huaji është shtetas.
2. Të huajve në udhëtim ajror, ujqor mund t'i lëshohet leja e kalimit të kufirit edhe në bazë të regjistrit të udhëtarëve të cilin e ka vërtetuar personi përgjegjës.
3. Regjistri i udhëtarëve përmban emrin dhe mbiemrin, vitin e lindjes, shtetësinë dhe numrin e dokumentit të udhëtimit të udhëtarëve, gjegjësisht numrin e ndonjë dokumenti tjetër me të cilin verifikohet identiteti.
4. Leja kufitare e qarkullimit lëshohet në afat vlefshmërie deri në nëntëdhjetë (90) ditë.

5. Leja kufitare e qarkullimit sipas këtij neni nuk i lëshohet të huajit nëse ekzistojnë shkaqet e përcaktuara në nenin 30 të këtij ligji.

Neni 30 **Ndalesa për hyrje dhe ri-hyrje**

1. Përveç se kur parashikohet ndryshe hyrja në Kosovë nuk i lejohet të huajit nëse:

- 1.1. nuk i plotëson kushtet nga neni 5 të këtij ligji;
- 1.2. nuk posedon mjete të mjaftueshme financiare për jetesë gjatë kohës së qëndrimit në Republikën e Kosovës, si dhe për kthimin në shtetin prej nga ka ardhur apo për udhëtim në vendin e tretë;
- 1.3. është në transit dhe nuk i plotëson kushtet për hyrje në shtetin e tretë;
- 1.4. është në fuqi urdhri i deportimit me ndalesë për ri-hyrje;
- 1.5. nuk posedon vërtetimin për vaksinimin, e vjen nga zona ku mbretëron epidemia e sëmundjeve ngjitëse;
- 1.6. këtë e kërkojnë shkaqet e mbrojtjes të rendit juridik apo sigurisë kombëtare;
- 1.7. ekziston dyshimi i bazuar që qëndrimi i tij mund të jetë i lidhur me kryerjen e veprave penale të cilat ndiqen sipas detyrës zyrtare;
- 1.8. është i evidentuar në listën e personave të kërkuar.

2. Vendimi për deportimin e të huajit mund të përcaktojë ndalesën e ri-hyrjes së tij. Ndalesa e ri-hyrjes regjistrohet në dokumentin e udhëtimit të të huajit. Pas daljes nga territori i Republikës së Kosovës, i huaji ka të drejtë të ushtroje ankim pranë gjykatës kompetente ndaj kohëzgjatjes së ndalesës së ri-hyrjes.

3. Qeveria e Republikës së Kosovës përcakton shumën e mjeteve për jetesë sipas paragrafit 1. nën-paragrafit 1.2. të këtij neni.

Neni 31 **Mbajtja në kufirin shtetëror**

Kur të huajit i refuzohet hyrja në territorin e Republikës së Kosovës dhe kthimi i tij i menjëhershëm është i pamundur, atëherë i huaji mund të mbahet në objektet e destinuar për këtë qëllim, deri në krijimin e kushteve për kthim.

Neni 32

Kalimi ilegal i kufirit

1. Kalimi ilegal i kufirit shtetëror konsiderohet atëherë kur i huaji:

- 1.1. nuk i plotëson kushtet e përcaktuara në nenin 5 të këtij ligji.
- 1.2. tenton të kalojë kufirin shtetëror jashtë pikës së kalimit kufitar apo kohës të caktuar për kalimin e kufirit shtetëror;
- 1.3. shmanget apo tenton t'i shmanget kontrollit kufitar;
- 1.4. gjatë kalimit të kufirit shtetëror përdor dokumentin e udhëtimit jo të vlefshëm, të falsifikuar si dhe dokumente udhëtimi autentike të personave të tjerë të përdorura në mënyrë abuzive;
- 1.5. jep të dhëna të rrejshme zyrtarëve të autorizuar për kontrollin e kalimit të kufirit shtetëror;
- 1.6. hyn në Republikën e Kosovës ndërkohë që urdhri për largim me ndalesë për rihyrje është në fuqi.

Neni 33

Kufizimi kohor i qëndrimit pa vizë

I huaji, të cilit për hyrje në Republikën e Kosovës nuk i kërkohet viza, mund të qëndrojë në Kosovë jo më gjatë se nëntëdhjetë (90) ditë, në një periudhë kohore prej gjashtë (6) muajve, të llogaritur nga dita e parë e hyrjes, përveç se me dispozitat këtij ligji apo me marrëveshje ndërkombëtare nuk parashihet ndryshe.

Neni 34

Dalja nga Republika e Kosovës

1. Të huajt munden lirisht të dalin nga Republika e Kosovës, përveç se kur:

- 1.1. i huaji posedon dokumentet e huaja të pa vlefshme, dokumente të falsifikuara si dhe dokumente udhëtimi autentike të personave të tjerë të përdorura në mënyrë abuzive;
- 1.2. i huaji nuk plotëson kushtet për hyrje në shtetin tjetër;
- 1.3. për të huajin ekziston dyshimi i bazuar se do t'i shmanget ndjekjes për vepra penale apo për kundërvajtje, fletarrestimit, apo shlyerjes së detyrimeve të përcaktuara me ligj;

1.4. këtë e kërkojnë shkaqet e mbrojtjes së rendit kushtetues, te sigurisë kombëtare ose te shëndetit publik, në mbështetje të vendimit të organit kompetent.

2. Të huajit i lejohet dalja nga Republika e Kosovës kur pushojnë së ekzistuari shkaqet nga paragrafi 1. i këtij neni.

3. Në rastet kur i huaji refuzon të largohet nga territori i Republikës së Kosovës në pajtim me nën-paragrafin 1.4. të paragrafit 1. të këtij neni, ministria i lëshon një vendim me shkrim. I huaji ka të drejtë ankese ndaj këtij vendimi pranë gjykatës kompetente. Gjykata duhet të nxjerr vendim lidhur me këtë çështje brenda afatit shtatëdhjetë (72) orë prej momentit të parashtrimit të ankesës. Gjykata mund ta anulojë vendimin, te liroje të huajin dhe te urdhërojë largimin e tij nga Republika e Kosovës.

KREU V

QËNDRIMI I TË HUAJVE

Neni 35

Llojet e qëndrimit

1. Qëndrimi i të huajve në Republikën e Kosovës mund të jetë:

1.1. qëndrimi deri në nëntëdhjetë (90) ditë;

1.2. qëndrimi i përkohshëm;

1.3. qëndrimi i përhershëm.

Neni 36

Qëndrimi deri në nëntëdhjetë (90) ditë

1. Qëndrim deri në nëntëdhjetë (90) ditë nënkupton qëndrimin afat shkurtër të të huajit në Republikën e Kosovës pa vizë, me vizë ose me leje qarkullimi kufitar, nëse me dispozitat e këtij ligji apo me marrëveshje ndërkombëtare nuk parashihet ndryshe.

2. Të huajit të cilit i është dhënë leja për qëndrim nëntëdhjetë (90) ditë për qëllime të caktuara, mund të qëndroj në Kosovë vetëm në pajtim me qëllimin për çka i është dhënë leje qëndrimi afat shkurtër deri në nëntëdhjetë (90) ditë.

Neni 37
Qëndrimi i përkohshëm

1. Leja për qëndrim të përkohshëm i jepet të huajit i cili:

1.1. ka për qëllim të qëndroj në Kosovë më gjatë se nëntëdhjetë (90) ditë ose për shkaqe të cekura në nenin 40 të këtij ligji;

1.2. qëndron në Republikën e Kosovës për më gjatë se tridhjetë (30) ditë dhe është i angazhuar në kategorinë e punësimit të përcaktuar në aktin ligjor që rregullon punësimin e të huajve në Republikën e Kosovës.

Neni 38
Kushtet për qëndrimin e përkohshëm

1. Leja për qëndrim të përkohshëm për herë të parë, lëshohet në afat vlefshmërie deri në një (1) vit, nëse me dispozitat e këtij ligji apo me marrëveshje ndërkombëtare nuk parashihet ndryshe.

2. Afati i vlefshmërisë së dokumentit të udhëtimit duhet të jetë më së paku tre (3) muaj më e gjatë se sa koha për të cilën lëshohet leja për qëndrim të përkohshëm.

3. Përjashtimisht nga paragrafi 2. i këtij neni, i huaji i cili nuk posedon dokumentin e udhëtimit të vlefshëm, leja për qëndrim të përkohshëm i vazhdohet me vendim të ministrisë përkatëse.

Neni 39
Kërkesa për leje qëndrim të përkohshëm

1. Kërkesën për lëshimin e lejes për qëndrim të përkohshëm, i huaji e parashtron pranë ministrisë.

2. Leja për qëndrim të përkohshëm sipas paragrafit 1. të këtij neni, jepet vetëm për qëllimin për të cilin është kërkuar.

3. Kërkesa për vazhdimin e qëndrimit të përkohshëm i paraqitet ministrisë jo më vonë se tridhjetë (30) ditë para skadimit të afatit të qëndrimit të përkohshëm.

4. Nëse i huaji, i cili për shkaqe të arsyeshme nuk mund të dorëzojë kërkesën për vazhdimin e qëndrimit brenda afatit ligjor, ai mund të kërkojë rivendosjen në afat të ankimit brenda tre (3) ditëve nga dita e marrjes së vendimit. Ministria do të vendosë për kërkesën brenda tri (3) ditësh nga dorëzimi i saj. Kërkesa për rivendosjen në afat dhe shqyrtimi i saj e pezullon vendimin për dëbimin e të huajit nga Kosova.

Neni 40
Qëllimi i qëndrimit të përkohshëm

1. Qëllimi i qëndrimit të përkohshëm mund të jetë për:
 - 1.1. qëllim pune;
 - 1.2. studim dhe shkollim;
 - 1.3. bashkim familjar; dhe
 - 1.4. shkaqe tjera të arsyeshme të caktuara me legjislacionin në fuqi apo marrëveshje ndërkombëtare.
2. Kategorizimi i lejeve të qëndrimit rregullohet me akt nënligjor të nxjerr nga Ministria.

Neni 41
Kërkesa për qëndrim të përkohshëm

1. Të huajit mund t'i lejohet qëndrimi i përkohshëm nëse:
 - 1.1. posedon mjete të mjaftueshme financiare për jetesë;
 - 1.2. ka banimin e siguruar;
 - 1.3. ka sigurim shëndetësor;
 - 1.4. qëndrimi i tij nuk është në kundërshtim me nenin 49 të këtij ligji;
 - 1.5. ka paraqitur argumentet mbi arsyshmërinë e qëndrimit të përkohshëm.
2. Krahës kërkesës për qëndrim të përkohshëm për herë të parë dhe për vazhdim, i huaji është i obliguar të paraqes vërtetimin që nuk është i dënuar nga shteti në të cilin ka banimin e fundit.
3. Kundër vendimit me të cilin refuzohet kërkesa për lejen e qëndrimit të përkohshëm mund të parashtrohet ankesa në afat prej tetë (8) ditëve prej ditës së pranimi të vendimit.
4. Ankesën nga paragrafi 3. i këtij neni e shqyrton Komisioni për Shqyrtimin e ankesave brenda tridhjetë (30) ditësh në kuadër të ministrisë përkatëse. Ankesa nuk e ndalon ekzekutimin e vendimit.

Neni 42
Qëllimet për qëndrim të përkohshëm

1. Të huajit të cilit i është dhënë leja për qëndrim të përkohshëm për qëllime të caktuara, mund të qëndrojë në Kosovë vetëm në pajtim me qëllimin për çka i është dhënë leje qëndrimi i përkohshëm.
2. Të huajit të cilit i është dhënë leja për qëndrim të përkohshëm për qëllim të caktuar, përveç të huajit i cili qëndron me qëllim të punës sezonale dhe i huaji i cili është i angazhuar në kategorinë e veçantë të punësimit të përcaktuar në aktin ligjor që rregullon punësimin e të huajve në Republikën Kosovës, e që ka për qëllim të qëndroj në Republikën e Kosovës më tepër se tridhjetë (30) ditë mund të parashtojë kërkesën për leje qëndrim mbi baza tjera.

Neni 43
Qëndrim i përkohshëm për qëllime pune

1. Qëndrimi i përkohshëm për qëllime pune i lejohet të huajit:
 - 1.1. të cilit i është lëshuar leja e punës;
 - 1.2. të cilit nuk i duhet leja e punës, por ka për qëllim të qëndrojë në Kosovë më gjatë se tridhjetë (30) ditë nëse i plotëson kushtet tjera të parashikuara me dispozitat e këtij ligji.
2. Leje qëndrimi të përkohshëm me qëllim të punës i lëshohet të huajit në afatin jo më gjatë se që i është lëshuar edhe leja e punës.

Neni 44
Rregullimi i punësimit të të huajve

Punësimi i të huajve në Republikën e Kosovës rregullohet me akt të veçantë ligjor.

Neni 45
Qëndrimi i përkohshëm për qëllime arsimimi

1. Kërkesa për lëshimin e lejes për qëndrim të përkohshëm me qëllim të shkollimit, shërbimit vullnetar, trajnimit pa pagesë, është i obliguar që përveç kushteve të parapara në nenin 41 të këtij ligji t'i bashkëngjisë edhe certifikatën e lëshuar nga institucioni legjitim që i pranon në Republikën e Kosovës.
2. Leja për qëndrim të përkohshëm në kuptimin e shkollimit apo studimeve mund të vazhdohet më së gjati deri në dy (2) vjet pas skadimit të afatit të caktuar me rregulla për kohën e zgjatjes së shkollimit respektivisht studimit.

Neni 46
Qëndrimi i përkohshëm me qëllim të bashkimit familjar

1. Kërkesën për lëshimin e lejes për qëndrim të përkohshëm me qëllim të bashkimit familjar, ka të drejtë ta paraqes i huaji-anëtari i ngushtë i familjes së shtetasit të Republikës së Kosovës, të huajit të cilit i është lejuar qëndrimi i përkohshëm apo përhershëm ose i huaji i cili ka statusin e azilantit.
2. Anëtarët e familjes së ngushtë, në kuptimin e dispozitave të këtij ligji, konsiderohen bashkëshortët, fëmijët e mitur të cilët nuk kanë krijuar familjet e tyre si dhe prindërit e fëmijëve të mitur. Anëtar i familjes së ngushtë mund të konsiderohet edhe i afërmi tjetër, i adoptuar ose adoptuesi, nëse ekzistojnë shkaqe të veçanta personale apo humanitare për bashkimin e familjes në Republikën e Kosovës.
3. Në rastin e paraqitjes së kërkesës për qëndrim të përkohshëm sipas këtij neni kushtet e parapara në nenin 41 të këtij ligji duhet të plotësohen edhe nga anëtari i familjes me qëndrim në Republikën e Kosovës. Në bazë të qëndrimit të përkohshëm sipas këtij neni, i huaji mund të punoj në Republikën e Kosovës në bazë të kushteve të parapara në nenin 43 të këtij ligji.

Neni 47
Vazhdimi i qëndrimit të përkohshëm me qëllim të bashkimit familjar

1. Të huajit, anëtar të ngushtë të familjes së shtetasit të Republikës së Kosovës, pas kërkesës mund t'i vazhdohet qëndrimi i përkohshëm në afat deri tri (3) vite gjegjësisht deri në plotësimin e kushteve për lëshimin e lejes për qëndrim të përhershëm.
2. I huaji, anëtar i ngushtë i familjes së shtetasit të Republikës së Kosovës, mund të kërkojë vazhdimin e qëndrimit të tij të përkohshëm edhe në rastin kur parashtruesi i kërkesës së tij për qëllime të bashkimit familjar, me qëndrim të përkohshëm, ka vdekur ose martesa e tyre që ka zgjatur së paku tri (3) vite në Republikën e Kosovës ka përfunduar.

Neni 48
Qëndrimi i përkohshëm për fëmijët e porsalindur

1. Për fëmijun e lindur në territorin e Republikës së Kosovës, i cili nuk është shtetas i Republikës së Kosovës, nuk kërkohet leje qëndrimi derisa t'i mbush gjashtë (6) muaj jetesë.
2. Pas gjashtë (6) muaj qëndrimi të përkohshëm, leja për qëndrim të përkohshëm i jepet fëmijës sipas detyrës zyrtare, kurse i vazhdohet për atë kohë për të cilën është lejuar qëndrimi i përkohshëm i njërit prind apo kujdestarit të fëmijut.

Neni 49

Revokimi i qëndrimit të përkohshëm

1. Të huajit i revokohet leja e qëndrimit të përkohshëm nga ministria përkatëse, nëse:
 - 1.1. vërtetohet ekzistimin e shkaqeve nga neni 30 i këtij ligji;
 - 1.2. punon në Republikën e Kosovës pa leje të vlefshme pune, gjegjësisht në kundërshtim me dispozitat e këtij ligji;
 - 1.3. qëndron në Republikën e Kosovës në kundërshtim me qëllimin për çka i është dhënë leja;
 - 1.4. cenon rendin publik apo vlerat tjera demokratike të shoqërisë të mbrojtura me ligj.
2. Me rastin e revokimit të vendimit për qëndrimin e të huajit, duhet t'i merret parasysh kohëzgjatja e qëndrimit në atë shtet dhe rrethanat personale, familjare, ekonomike e të tjera.
3. Revokimi i qëndrimit jepet në formë të shkruar dhe për këtë njoftohen ministritë përkatëse.
4. Pas revokimit të leje qëndrimit, i huaji nuk ka të drejtë të paraqesë kërkesë për leje qëndrimi në Republikën e Kosovës së paku një (1) vit nga marrja e vendimit për revokim.

Neni 50

Ekzekutimi i revokimit të qëndrimit të përkohshëm

1. Ministria përkatëse ndërpret qëndrimin e të huajit i cili qëndron në Republikën e Kosovës, dhe të huajit që i është lejuar qëndrimi deri në nëntëdhjetë (90) ditë apo qëndrimi i përkohshëm dhe revokimi ekzekutohet menjëherë nëse:
 - 1.1. të huajit i është shqiptuar urdhri i dëbimit me apo pa ndalesë për ri-hyrje;
 - 1.2. i është revokuar qëndrimi i përkohshëm;
 - 1.3. skadon e afati për të cilin qëndrimi i përkohshëm i është lejuar.
2. Ekzekutimin e vendimit për revokim të qëndrimit të përkohshëm e bën Policia e Kosovës.

Neni 51

Qëndrimi i përhershëm

1. Qëndrimi i përhershëm i lejohet të huajit i cili:

1.1. deri në ditën e paraqitjes së kërkesës për qëndrim të përhershëm, ka pesë (5) vite qëndrim të përkohshëm pa ndërprerë;

1.2. ka tre (3) vite bashkëshortësie në vazhdimësi me shtetasin e njëjtë të Republikës së Kosovës apo me të huajin me leje qëndrimi të përhershëm.

2. Personit të mitur me qëndrim të përkohshëm në Republikën e Kosovës i lejohet qëndrimi i përhershëm nëse njeri nga prindërit është i huaji me leje qëndrimi të përhershme, me pëlqimin e prindit tjetër.

3. Përjashtimisht, qëndrimi i përhershëm i lejohet edhe të huajve të tjerë me qëndrim të përkohshëm për shkaqe humanitare apo nëse kjo është në interes të Republikës së Kosovës për ta bërë atë.

4. Organi kompetent përcakton njohjen e qëndrimit të përhershëm sipas paragrafit 3. të këtij neni.

5. Kohën të cilën i huaji e ka kaluar në vuajtjen e dënimit me burg, nuk i llogaritet në kohën që i duhet për lejimin e qëndrimit të përhershëm, përveç në rastet kur personi përfundimisht lirohet ose kur aktvendimi përfundimtar është anuluar.

6. Qëndrimi i pandërprerë në Republikën e Kosovës konsiderohet edhe nëse i huaji qëndron jashtë Republikës së Kosovës deri në nëntëdhjetë (90) ditë brenda gjashtë (6) muaj ose me autorizim të veçantë të ministria përkatëse deri në gjashtë (6) muaj brenda një (1) viti.

Neni 52

Kërkesa për qëndrim të përhershëm

1. Kërkesa për dhënien e lejes për qëndrim të përhershëm parashtrohet pranë ministrisë përkatëse:

2. Kundër vendimit të ministrisë përkatëse nuk është e lejuar ankesa, mirëpo mund të ngritet kontesti juridik.

Neni 53
Refuzimi i qëndrimit të përhershëm

1. Qëndrimi i përhershëm nuk i lejohet të huajit i cili:

- 1.1. ka qenë i dënuar për vepër penale brenda ose jashtë territorit të Republikës së Kosovës;
- 1.2. nuk posedon mjete financiare për jetesë;
- 1.3. nuk ka banim të siguruar;
- 1.4. nuk ka sigurim shëndetësor;
- 1.5. paraqet rrezik ndaj rendit juridik, sigurisë kombëtare ose shëndetit publik.

2. Dënimi për vepër penale në kuptim të nën-paragrafit 1.1. të paragrafit 1. të këtij neni nuk përfshin:

- 2.1. dënimin për vepër penale me gjobë ose deri në gjashtë (6) muaj heqje lirie, nëse gjykata ka shqiptuar dënimin me kusht;
- 2.2. dënimin për vepër penale të shqiptuar nga një gjykatë e huaj nëse vepra në fjalë nuk konsiderohet vepër penale në Republikën e Kosovës ose nëse dënimi është shqiptuar në bazë të një procedure e cila nuk është konform standardeve evropiane të së drejtës penale, veçanërisht me Konventën Evropiane për të drejtat e njeriut dhe liritë themelore; dhe
- 2.3. dënimin për vepër penale të shlyer në mënyrë legjitime nga evidenca e të dënuarve.

Neni 54
Revokimi i qëndrimit të përhershëm

1. Të huajit i revokohet leja e qëndrimit të përhershëm nga ministria përkatëse nëse:

- 1.1. është i dënuar për vepra penale me dënim pa kusht dhe të plotfuqishëm prej gjashtë (6) muaj e më tepër;
- 1.2. këtë e kërkojnë arsyet e mbrojtjes së rendit kushtetues, sigurisë kombëtare apo shëndetit publik.

2. Me rastin e revokimit të qëndrimit, të të huajit duhet t'i merret parasysh kohëzgjatja e deriatëhershme e qëndrimit dhe rrethanat personale, ekonomike, familjare dhe rrethanat e tjera

3. Revokimi i qëndrimit jepet në formë të shkruar dhe për këtë njoftohen ministritë përkatëse.

Neni 55
Ekzekutimi i revokimit të qëndrimit të përhershëm

1. Ministria përkatëse ndërpret qëndrimin e të huajit të cilit i është lejuar qëndrimi i përhershëm dhe e ekzekuton menjëherë nëse:

1.1. të huajit i është shqiptuar urdhri për dëbim me apo pa ndalesë për ri-hyrje;

1.2. ministria përkatëse e konstaton që i huaji është shpërngulur, ose pandërprerë qëndron jashtë Republikës së Kosovës, me gjatë se gjashtë (6) muaj, e për këtë nuk ka njoftuar ministrinë përkatëse;

1.3. i është revokuar qëndrimi i përhershëm.

2. Në rastin nga nën-paragrafi 1.2. i paragrafit 1. të këtij neni, vendimin për revokimin e qëndrimit të përhershëm nxjerr ministria përkatëse.

3. Ministria përkatëse mund të merr vendim edhe pa dëgjimin paraprak të të huajit.

4. Ekzekutimin e vendimit për revokim të qëndrimit të përhershëm e bën Policia e Kosovës.

KREU VI
QËNDRIMI I PALIGJSHËM

Neni 56
Qëndrimi i paligjshëm

1. Konsiderohet se i huaji qëndron në mënyrë të paligjshme në Republikën e Kosovës, nëse nuk posedon vizën apo lejen e qëndrimit nga neni 5 i këtij ligji.

2. I huaji i cili qëndron në mënyrë të paligjshme në Republikën e Kosovës, duhet menjëherë apo në afatin që i është caktuar t'a lëshojë territorin e Republikës së Kosovës.

3. Konsiderohet që i huaji e ka lëshuar Kosovën, në momentin e kalimit të kufirit shtetëror.

4. I huaji i cili ka paraqitur kërkesën brenda afatit ligjor për vazhdimin e qëndrimit të përkohshëm mund të qëndroj në Kosovë deri në marrjen e vendimit të plotfuqishëm.

Neni 57

Urdhri për largim

1. Ministria ia cakton të huajit afatin dhe kohën e caktuar, të cilin e obligon që ta lëshoj territorin e Republikës së Kosovës, pikën e kalimit kufitar ku do ta lëshoj vendin dhe e obligon që të lajmërohet te organi për kontrollin e kufirit shtetëror gjatë largimit nga territori i Republikës së Kosovës në rastet kur:

- 1.1. i refuzohet kërkesa për leje qëndrim;
- 1.2. i refuzohet kërkesa për vazhdimin e leje qëndrimit;
- 1.3. i revokohet leje qëndrimi.

2. Organi për kontrollin e kufirit shtetëror ia cakton të huajit afatin dhe kohën e caktuar, të cilin e obligon ta lëshoj territorin e Republikës së Kosovës, pikën e kalimit kufitar ku do ta lëshoj vendin dhe e obligon që të lajmërohet te organi për kontrollin e kufirit shtetëror gjatë largimit nga territori i Republikës së Kosovës në rastin kur qëndron në Republikën e Kosovës sipas nenit 55 të këtij ligji.

3. Me rastin e caktimit të afatit për lëshimin e shtetit, organin i cili e ka lëshuar urdhër largimin duhet ta ketë në konsideratë kohën për të cilën i huaji mund ta bëjë lëshimin, por afati nuk mund të jetë më i gjatë se tridhjetë (30) ditë.

4. Pas lëshimit të urdhër largimit, i huaji nuk ka të drejtë rihyrje në Republikën e Kosovës jo më pak se gjashtë (6) muaj dhe jo më shumë se një (1) vit.

5. Ankesa kundër vendimit mbi caktimin e afatit për lëshimin e shtetit nuk ndalon ekzekutimin e vendimit.

6. Afati për lëshimin e Republikës së Kosovës numërohet prej ditës së dorëzimit të vendimit të urdhrit për largim.

7. I huaji brenda afatit të caktuar për urdhër për largim, mund të kërkoj që t'i caktohet një datë tjetër për largim nga territori i Republikës së Kosovës. Kërkesa për shtyrje të afatit të urdhër largimit nuk e ndalon ekzekutimin.

Neni 58

Rrethanat që merren parasysh për caktimin e afatit të vendimit të urdhrit për largim

Me rastin e marrjes së vendimit për caktimin e afatit për urdhrin për largim të të huajit nga Republika e Kosovës, organi i cili e ka lëshuar urdhër largimin merr parasysh kohën e qëndrimit, si dhe rrethanat personale, ekonomike, familjare dhe rrethanat tjera të të huajit.

Neni 59
Detyrimet e organeve tjera shtetërore

1. Organet shtetërore, duhet që pa vonesë të informojnë organin për kontrollin e kufirit - policinë kufitare për qëndrimin e paligjshëm të të huajit në Republikën e Kosovës.
2. Zyrtari i policisë kufitare i cili kundër të huajit ka inicuar procedurën për kundërvajtje apo për vepra penale për të cilat ndiqet sipas detyrës zyrtare, obligohet që pa vonesë ta informoj ministrinë përkatëse.

KREU VII
DËBIMI I TË HUAJVE

Neni 60
Ekzekutimi i dëbimit

1. I huaji mund të dëbohet, me apo pa ndalesë të ri-hyrjes, sipas vendimit të gjykatës kompetente.
2. Të huajit që i është shqiptuar urdhri për dëbim me apo pa ndalesë të hyrjes, duhet detyrimisht dhe menjëherë të largohet nga territori i Republikës së Kosovës dhe në të njëjtën mënyrë veprohet edhe me të huajin i cili duhet të kthehet në bazë të marrëveshjes ndërkombëtare.
3. Policia ekzekuton vendimin e gjykatës kompetente për dëbimin e të huajit i cili ilegalisht qëndron në Republikën e Kosovës.

Neni 61
Mos-kthimi i të huajve për shkak të kërcënimit

1. Të huajt nuk duhet të dëbohen ose të kthehen në asnjë mënyrë në shtete ose kufijtë e territoreve ku jeta ose liria e tij do të rrezikohet për shkak të racës, fesë, kombësisë, anëtarësisë në një grup të veçantë shoqëror ose mendimit politik.
2. Të drejtat e përcaktuara në paragrafin 1. të këtij neni, megjithatë nuk mund të zbatohen ndaj të huajit për të cilin ka arsye të forta se ai është i rrezikshëm për sigurinë e shtetit në të cilin ai është apo ka qenë i dënuar me vendim të plotfuqishëm për krim të rëndë, që paraqet rrezik të vazhdueshëm për qytetarët e atij shteti.
3. Personi nuk mund të dëbohet apo kthehet në asnjë mënyrë në shtetin tjetër kur ekzistojnë arsye të forta për të besuar që ai do të jetë në rrezik për t'iu nënshtruar torturës apo trajtimeve jo njerëzore dhe degraduese.

Neni 62

Ndalimi dhe mbajtja e të huajit

1. Të huajit mund t'i refuzohet hyrja në kufi për shkaqe të sigurisë publike. Për të siguruar largimin e të huajit nga territori i Republikës së Kosovës, i huaji mund të ndalohej në afatin sa më të shkurtër të mundshëm.
2. Të huajit të cilit nuk mund t'i verifikohet identiteti, nuk ka vizë të vlefshme, nuk ka leje qëndrimi apo nuk mund të dëbohet sipas urdhrit paraprak për dëbim, mund të mbahet në Qendrën e Pranimit për të Huaj.
3. I huaji i cili për shkaqe shëndetësore, nevojave tjera të veçanta apo arsyeve tjera nuk është e mundur të vendoset në Qendër, vendoset në ndonjë vend tjetër me standarde të pranueshme dhe adekuate.
4. Të sistemuarit në qendrën e pranimit apo në vende tjera në pajtim me dispozitat e këtij ligji, do të vendosen në hapësira të ndara. Personat nën moshën tetëmbëdhjetë (18) vjeçar do të vendosen ndaras nga të rriturit, me përjashtim të anëtarëve të familjes së ngushtë të cilët duhet të vendosen së bashku. Fëmijët do të marrin tërë asistencën e duhur përkitazi me moshën e tyre dhe do të trajtohen në pajtim me dispozitat dhe parimet e Konventës mbi të Drejtat e Fëmijëve të vitit 1989.
5. Anëtarët e komitetit Ndërkombëtar të Kryqit të Kuq, të Komisaritit të Lartë të Kombeve të Bashkuara për Refugjatë dhe Komitetit Evropian për Parandalimin e Torturës, do të kenë qasje të papenguar, e cila nuk do t'i nënshtrohet asnjë forme të autorizimit, në Qendër dhe vendet tjera kudo që ndonjë person mbahet në pajtim të dispozitave të këtij ligji dhe ligjeve tjera përmes të cilëve zbatohen dispozitat e këtij ligji.

Neni 63

Afatet e mbajtjes të të huajit

1. I huaji mbahet në Qendër deri sa të dëbohet, por jo më shumë se nëntëdhjetë (90) ditë.
2. Pas skadimit të afatit fillestar nëntëdhjetë (90) ditor, me kërkesë të policisë i huaji mund të mbahet, apo të kthehet në Qendër edhe për nëntëdhjetë (90) ditë tjera pas vendimit të gjykatës kompetente, nëse:
 - 2.1. procedura e përcaktimit të identitetit të tij ose grumbullimi i dokumenteve personale të kërkuara është në vazhdim;
 - 2.2. këtë e kërkojnë shkaqet e sigurisë.
3. Në asnjë rrethanë i huaji nuk mund të mbahet për më tepër se njëqindetëdhjetë (100) ditë në qendër.

4. I huaji mund të lirohet në çdo kohë nga qendra pas vendimit të gjykatës kompetente nëse nuk ka arsye për dëbimin e tij.

Neni 64

Kushtet për mbajtje të të huajit

1. Gjatë kohës së mbajtjes në Qendër, i huaji është i obliguar t'i përmbahet rregullave të banimit të Qendrës, dhe nuk i lejohet të largohet pa leje.
2. I huaji për të cilin ekziston baza e arsyeshme që nuk do t'i përmbahet rregullave në Qendrës apo do të provojë të largohet nga Qendra pa leje ai do të mbahet nën kushtet e mbikëqyrjes së shtuar brenda Qendrës.

Neni 65

Vendimi për mbajtjen e të huajit

1. Mbajtjen në qendër e cakton me vendim gjykata kompetente.
2. Ankesa nuk e ndalon ekzekutimin e vendimit për mbajtje.

Neni 66

Ndërprerja e mbajtjes së të huajit në Qendër

1. Mbajtja e të huajit në Qendër ndërpritet me:
 - 1.1. largimin e të huajit nga shteti;
 - 1.2. kalimin e kohës sipas nenit 63 të këtij ligji;
 - 1.3. në çfarëdo kohe me vendim të gjykatës kompetente.

Neni 67

Qëndrimi i përkohshëm i të huajit

1. Qëndrimi i përkohshëm në Kosovë i lejohet të huajit, i cili nuk mund të dëbohet nga Republika e Kosovës.
2. Ministria përkatëse qëndrimin e përkohshëm e lejon dhe e vazhdon deri në gjashtë (6) muaj në bazë të kërkesës së të huajit apo sipas detyrës zyrtare.

Neni 68
Kufizimi i lëvizjes së të huajit me qëndrim të përkohshëm

1. Të huajit me qëndrim të përkohshëm në bazë të nenit 67 të këtij ligji, në Republikën e Kosovës mund t'i kufizohet lëvizja vetëm në komunën e caktuar apo në zonën e përcaktuar gjeografike brenda komunës, dhe mund t'i caktohet lajmërimi i detyruar në stacionin më të afërt policor. Kufizimi i lëvizjes dhe lajmërimi i detyruar mund të zgjasë deri në gjashtë (6) muaj.
2. Të huajit të cilit i është lejuar qëndrimi i përkohshëm në Republikën e Kosovës, ministria përkatëse i cakton adresën e banimit.
3. Të huajit të cilit i është lejuar qëndrimi i përkohshëm nuk i ndërpritet dhe nuk i ndryshohet obligimi për lëshimin e Republikës së Kosovës.
4. Qëndrimi i përkohshëm shënohet në dokumentin e udhëtimit të të huajit, ndërsa i huaji i cili nuk posedon dokumentin e udhëtimit, i lëshohet dokumenti me fotografi.

Neni 69
Ndërprerja e qëndrimit të përkohshëm

1. Qëndrimi i përkohshëm në Republikën e Kosovës ndërpritet me:
 - 1.1. largimin e të huajit prej shtetit;
 - 1.2. skadimin e afatit të vlefshmërisë së qëndrimi i përkohshëm;
 - 1.3. anulimin e qëndrimit të përkohshëm.
2. Qëndrimi i përkohshëm mund të anulohet nëse:
 - 2.1. shkaqet për të cilat kërkesa e parë për qëndrim të përkohshëm pushojnë së ekzistuari;
 - 2.2. i huaji i thyen ndalesat e parapara në nenin 68 të këtij ligji.

Neni 70
Mbajtja e të miturit të huaj

1. I huaji i mitur, vendoset në qendër së bashku me familjen e tij të ngushtë apo kujdestarit, përjashtimisht nëse për të miturin është më i përshtatshëm ndonjë akomodim tjetër.

2. Të huajit të mitur më të ri se gjashtëmbëdhjetë (16) vjet në rastet e arsyeshme mund t'i caktohet mbikëqyrja e shtuar brenda Qendrës vetëm në praninë e familjes së ngushtë apo kujdestarit të tij.

Neni 71

Pagimi i shpenzimeve lidhur me mbajtjen në Qendër

1. I huaji është i obliguar t'i bart shpenzimet e tij të banimit në qendër dhe shpenzime tjera të cilat krijohen me rastin e dëbimit.

2. Shpenzimet në lidhje me mbajtjen dhe dëbimin e të huajit që nuk ka mjete financiare i bartë punëdhënësi i fundit i cili ka punësuar të huajin në Republikën e Kosovës pa leje adekuate, si dhe personi i cili është i obliguar t'i mbulojë shpenzimet për të huajin gjatë kohës së qëndrimit në Republikën e Kosovës. Shpenzimet lidhura me mbajtjen dhe dëbimin e të huajit pa mjete financiare duhet të paguhen brenda tre (3) muaj pas vendimit të gjykatës kompetente.

3. Shpenzimet të cilat është e pa mundur të paguhen në pajtueshmëri me paragrafët 1. dhe 2. të këtij neni paguhen nga ministria përkatëse.

Neni 72

Konfiskimi i mjeteve

1. Ministria përkatëse të huajin të cilin e largon me dhunë mund t'i merr mjetet financiare dhe t'i paguaj shpenzimet në bazë të paragrafit 1. të nenit 71 të këtij ligji. Procesi i konfiskimit nuk duhet ta lë të huajin pa mjete për nevoja elementare.

2. Për mjetet e marra financiare lëshohet vërtetimi.

3. Për zbatimin e sigurt të largimit me dhunë, të huajit mund t'i merren përkohësisht dokumentet e udhëtimit dhe dokumente tjera si dhe bileta e udhëtimit. Për mbajtjen e përkohshme të dokumenteve dhe mjeteve lëshohet vërtetimi adekuat.

KREU VIII

DOKUMENTET PËR VERIFIKIMIN E IDENTITETIT

Neni 73

Vërtetimi i identitetit të të huajit

1. I huaji tregon identitetin e tij me: dokumentin e udhëtimit, letërnjoftim për të huajin, letërnjoftim të posaçëm, si dhe me dokumente tjera të cilat përmbajnë fotografinë.

2. I huaji është i obliguar të bartë njërin prej dokumenteve të parapara në paragrafin 1. të këtij neni, dhe në rast se i kërkohet nga personi zyrtar, duhet t'i tregoj dokumentin më të cilin e verifikon identitetin e tij dhe lejen me të cilën tregon legalitetin e qëndrimit në Republikën e Kosovës.

3. Të huajit i ndalohet që dokumentin e tij t'ia ofroj tjetrit për tu shërbyer me të, respektivisht nuk i lejohet të shërbehet me dokumente të pavlefshme ose me dokument të personit tjetër.

4. I huaji është i obliguar që të shërbehet me emrin e tij personal i cili është i shënuar në njërin nga dokumentet e tij të parapara në paragrafin 1. të këtij neni.

Neni 74

Letërnjoftimi për të huaj

1. Letërnjoftimi për të huaj i lëshohet të huajit mbi moshën gjashtëmbëdhjetë (16) vjeçare, të cilit i është lejuar qëndrimi i përhershëm apo qëndrimi i përkohshëm në Republikën e Kosovës.

2. Letërnjoftimin nga paragrafi 1. i këtij neni e lëshon ministria përkatëse.

Neni 75

Vlefshmëria e letërnjoftimit

1. Letërnjoftimi për të huajin të cilit i është lejuar qëndrimi i përkohshëm i lëshohet në përputhje me afatin e qëndrimit të përkohshëm të tij.

2. Letërnjoftimi për të huajin të cilit i është lejuar qëndrimi i përhershëm, lëshohet në afat vlefshmërie prej pesë (5) viteve.

Neni 76

Ndërrimi i letërnjoftimit

1. I huaji është i obliguar që letërnjoftimin për të huaj, ta ndërroj në raste të:

1.1. ndryshimit të të dhënave në letërnjoftim, kur është e dëmtuar apo e vjetruar në atë masë sa nuk mund të verifikoj identitetin e tij;

1.2. kur fotografia në letërnjoftim nuk tregon pamjen e tij të vërtetë.

2. I huaji është i obliguar që në afat prej tetë (8) ditësh prej ditës së paraqitjes së shkaqeve nga paragrafi 1. i këtij neni, të paraqes kërkesën pranë ministrisë përkatëse për ndërrimin e letërnjoftimit për të huaj.

Neni 77
Kthimi i letërnjoftimit të të huajit

1. I huaji është i obliguar që letërnjoftimin t’ia kthej ministrisë përkatëse nëse:
 - 1.1. ndryshohet vendqëndrimi i të huajit;
 - 1.2. i është revokuar qëndrimi, në pajtim me nenin 49 dhe 54 të këtij ligji;
 - 1.3. fiton shtetësinë e Republikës së Kosovës.

Neni 78
Humbja e dokumentit të identifikimit

1. I huaji është i obliguar që menjëherë të lajmërojë stacionin policor më të afërt për vjedhjen apo humbjen e dokumentit siç është përcaktuar në nenin 74 të këtij ligji.
2. Policia është e obliguar të lëshojë vërtetimin mbi rrethanat e humbjes apo vjedhjes së dokumentit nga paragrafi 1. i këtij neni.
3. I huaji i cili ka humbur dokumentin e udhëtimit të Republikës së Kosovës, apo në ndonjë mënyrë tjetër ka mbetur pa dokument ose letërnjoftim për të huaj jashtë Republikës së Kosovës, është i obliguar që menjëherë ta lajmëroj misionin diplomatik më të afërt, gjegjësisht zyrën konsullore të Republikës së Kosovës.

Neni 79
Mbajtja e dokumentit

1. Policia përkohësisht mund të mban dokumentin e të huajit nëse:
 - 1.1. është e nevojshme për verifikimin e identitetit të të huajit;
 - 1.2. ekzistojnë dyshime se ka kryer vepër penale ose mbajtja e dokumentit është bërë me vendim të gjykatës kompetente;
 - 1.3. nuk ka kryer obligimin pronësor juridik sipas kërkesës se gjykatës kompetente;
 - 1.4. nëse këtë e kërkojnë shkaqet për mbrojtjen e rendit kushtetues, sigurisë kombëtare apo shëndetit publik.
2. Dokumenti nga paragrafi 1. i këtij neni mbahet derisa të ekzistojnë arsyet për mbajtjen e tij.
3. Për mbajtjen e përkohshme të dokumentit i lëshohet dëshmi nga policia.

4. I huaji ka të drejtë ankese kundër vendimit për mbajtjen e përkohshme të dokumentit dhe ankesa duhet të vendoset nga ana e gjykatës me kompetencë territoriale.

KREU IX

VENDQËNDRIMI DHE VENDBANIMI

Neni 80

Vendqëndrimi dhe vendbanimi

1. Vendqëndrimi është vendi ku i huaji vendoset për qëndrim të përkohshëm.
2. Vendbanimi është vendi ku i huaji vendoset me lejen e qëndrimit të përhershëm.

Neni 81

Ndryshimi i adresës

1. I huaji me qëndrim të përkohshëm në Republikën e Kosovës, është i detyruar ta lajmëroj adresën dhe ndryshimin e adresës pranë organit kompetent në afat prej tri (3) ditësh nga dita e hyrjes në territorin e Republikës së Kosovës, gjegjësisht që nga dita e ndryshimit të adresës së banimit.
2. I huaji me qëndrim të përhershëm në Kosovë është i obliguar që ta lajmëroj vendbanimin dhe ndryshimin e adresës së banimit pranë organit kompetent në afat prej tetë (8) ditëve që nga dita e ndryshimit të adresës së banimit.
3. I huaji nga paragrafi 1. dhe 2. i këtij neni është i obliguar të ç'lajmëroj vendbanimin gjegjësisht vendqëndrimin para se ta lëshoj Republikën e Kosovës.

Neni 82

Lajmërimi i vendbanimit

1. Institucionet shëndetësore apo punonjësit shëndetësor të praktikës private të cilët pranojnë të huajt për shërim, obligohen ta lajmërojnë organin kompetent brenda njëzetekatër (24) orëve nga dita e pranimi të tij.
2. Personat fizik dhe juridik të cilët ofrojnë akomodim të të huajve, por edhe personat tek të cilët vijnë të huajt për vizitë në Republikën e Kosovës, janë të obliguar që të lajmërojnë organin kompetent për pranimin e të huajve brenda dymbëdhjetë (12) orëve nga pranimi i të huajit.

3. I huaji i cili nuk shfrytëzon akomodimin nga paragrafi 2. i këtij neni, obligohet që brenda njëzetekatër (24) orëve ta lajmëroj banimin te organi kompetent.
4. Ofruesi i akomodimit të përcaktuar në paragrafin 2. dhe 3. të këtij neni, duhet ta lajmëroj organin kompetent për pranimin e të huajit.
5. Ofruesi i akomodimit duhet të njoftoj organin kompetent brenda dymbëdhjetë (12) orëve për vendqëndrimin e të huajit.
6. Dispozitat nga paragrafi 1. deri në 4. të këtij neni kanë të bëjnë me të huajt të cilët qëndrojnë në Republikën e Kosovës deri në nëntëdhjetë (90) ditë.

Neni 83 **Evidenca e të huajve**

1. Personat fizik dhe juridik të cilët ofrojnë akomodim për të huajt, obligohen që të mbajnë evidencën për të huajt e akomoduar.
2. Personat nga paragrafi 1. i këtij neni janë të obliguar ta ruajnë evidencën mbi të huajt më së paku tre (3) vite nga dita e përmbylljes së saj.
3. Personat nga paragrafit 1. i këtij neni obligohen që me kërkesë zyrtare të zyrtarit të autorizuar të organit kompetent, t'i japin për shikim të dhënat nga evidenca e të huajve.

KREU X **LËVIZJA E TË HUAJVE NË UNIFORMË**

Neni 84 **Lëvizja me uniformë të huaj ushtarake**

1. Gjatë kohës së qëndrimit, të huajt në Republikën e Kosovës, mund të lëvizin në uniformë të huaj ushtarake në publik nëse:
 - 1.1. qëndron në Republikën e Kosovës si pjesëtar i misionit diplomatik, zyrës konsullore të shtetit të huaj apo ndonjë misioni tjetër të huaj, që gëzon status diplomatik në Republikën e Kosovës në cilësinë e këshilltarit apo përfaqësuesit ushtarak.
 - 1.2. është pjesëtar i misionit ushtarak apo delegacionit të huaj ushtarak në Republikën e Kosovës në një vizitë zyrtare;
 - 1.3. është duke vijuar programin arsimor në shkollë apo institucion ushtarak;

1.4. është duke kaluar transit në Republikën e Kosovës si pjesëtar i misionit të huaj ushtarak apo delegacionit me pasaportë zyrtare ose diplomatike;

1.5. është pjesëmarrës në ushtrime ushtarake apo trajnime.

2. Ministria e Punëve të Brendshme në pajtim me ministrinë përkatëse mund t’ju lejoj bartjen e uniformes së huaj ushtarake edhe të huajve tjerë gjatë kohës së qëndrimit të tyre në Republikën e Kosovës.

Neni 85

Lëvizja me uniformë të policisë dhe doganave të huaja

1. Të huajt mund të bartin uniformë të policisë dhe të doganave të huaja nëse:

1.1. është pjesëtar i delegacionit të huaj policor apo doganor që qëndron në vizitë zyrtare në Republikën e Kosovës;

1.2. kryen shërbimin në kontrollin e përbashkët të kalimit të kufirit shtetëror në pjesën e kufirit që i takon Republikës së Kosovës;

1.3. është duke vijuar programin arsimor në shkollë apo institucion policor;

1.4. është duke kaluar transit në Republikën e Kosovës si pjesëtar i misionit të huaj policor, doganor apo delegacionit me pasaportë zyrtare ose diplomatike.

KREU XI

MBIKËQYRJA DHE EVIDENCAT

Neni 86

Mbikëqyrja dhe inspektimi i këtij ligji

1. Mbikëqyrjen për zbatimin e këtij ligji e bën ministria përkatëse.

2. Mbikëqyrjen dhe inspektimin për zbatimin e këtij ligji për pjesën që ka të bëjë me punën e të huajve në Kosovë, e bën organi kompetent përkatës.

Neni 87
Ruajtja e të dhënave personale

1. Të gjitha të dhënat personale të mbledhura dhe dokumentet e lëshuara gjatë zbatimit të këtij ligji mbahen, ruhen dhe evidentohen në evidencën e organeve përgjegjëse.
2. Të dhënat personale të regjistruara në evidencat nga paragrafi 1. i këtij neni mbahen, përdoren dhe procesohen sipas dispozitave të legjislacionit në fuqi për mbrojtjen e të dhënave personale.

KREU XII
DISPOZITAT NDËSHKUESE

Neni 88

1. Me gjobë prej pesëdhjetë (50) deri njëmijepesëqind (1.500) Euro dënohet me kundërvajtje i huaji nëse:
 - 1.1. në mënyrë të paligjshme kalon kufirin e shtetit, sipas nenit 32 i këtij ligji;
 - 1.2. nuk e lëshon Republikën e Kosovës në afatin i cili i është caktuar me urdhër largim, sipas nenit 57 i këtij ligji;
 - 1.3. largohet nga Qendra pa leje apo nuk i përmbahet rregullave të banimit në Qendër, sipas nenit 64 i këtij ligji;
 - 1.4. largohet nga vendbanimi të cilin ia ka caktuar ministria përkatëse apo nuk i lajmërohet rregullisht stacionit me të afërm policor, sipas nenit 68 të këtij ligji;
 - 1.5. dokumentin e tij e jep në përdorim personit tjetër që të shërbehet me të, gjegjësisht nëse përdor dokumentin jo të vlefshëm apo përdor dokumentin e huaj sikur të tij, sipas paragrafit 3. të nenit 73 të këtij ligji;
 - 1.6. shërbehet me emër personal në kundërshtim me dispozitat e paragrafit 4. të nenit 73 të këtij ligji.
2. Përveç rasteve të lartpërmendura të huajit gjithashtu mund t'i shqiptohet masa e dëbimit.

Neni 89

1. Me gjobë prej pesëdhjetë (50) deri në njëmijë (1.000) Euro dënohet i huaji nëse:

- 1.1. në mënyrë të paligjshme qëndron në Republikën e Kosovës, sipas paragrafit 1. të nenit 56 të këtij ligji;
- 1.2. nuk posedon dokumentin e udhëtimit sipas nenit 5 të këtij ligji;
- 1.3. lëvizja jashtë zonës së caktuar, sipas paragrafit 2. të nenit 6 të këtij ligji;
- 1.4. refuzon që personit zyrtar të organit kompetent t'i paraqes për identifikim lejen me të cilën argumenton qëndrimin e ligjshëm në Kosovë, sipas paragrafit 2. të nenit 73 të këtij ligji; ose
- 1.5. qëndron në Kosovë në kundërshtim me qëllimin për çka i është dhënë viza apo leje qëndrimi, sipas nenit 35 të këtij ligji.

2. Përveç rasteve të lartpërmendura, të huajit mund t'i shqiptohet masa e dëbimit.

Neni 90

1. Me gjobë prej pesëdhjetë (50) deri pesëqind (500) Euro dënohet i huaji nëse:

- 1.1. nuk posedon ose argumenton dokumentin e identifikimit në përputhje me sipas paragrafit 2. të nenit 73 të këtij ligji;
- 1.2. në afatin e rregullt nuk paraqet kërkesën për ndërrimin e letërnjoftimit për të huaj, sipas paragrafit 2. të nenit 76 i këtij ligji;
- 1.3. nuk kthen letërnjoftimin, sipas nenit 77 të këtij ligji;
- 1.4. nuk lajmëron humbjen, zhdukjen apo vjedhjen e dokumentit sipas nenit 78 të këtij ligji;
- 1.5. nuk vepron në përputhje me kërkesat për vendbanim, sipas nenit 82 të këtij ligji;
- 1.6. nuk vepron në përputhje me dispozitat për ndërrimin e adresës, sipas nenit 81 të këtij ligji;
- 1.7. bartë uniformen e huaj ushtarake, policore apo doganore në kundërshtim me dispozitat e neni 84 dhe 85 të këtij ligji.

Neni 91

1. Me gjobë prej njëmijedyqind (1.200) deri gjashtëmijë (6.000) Euro dënohet personi juridik, ndërsa me gjobë prej dyqind (200) deri dymijë (2.000) Euro dënohet personi fizik nëse shkel dispozitat e nenit 26 të këtij ligji;

2. Personi juridik apo fizik, nga paragrafi 1. i këtij neni, gjithashtu mund të ndalohet ose të kufizohet në ushtrimin e veprimtarisë biznesore në Republikën e Kosovës.

Neni 92

1. Me gjobë prej katërqind (400) deri katërmijë (4.000) Euro dënohet personi juridik, ndërsa më shumë prej njëqindpesëdhjetë (150) deri dyqind (200) Euro dënohet personi fizik nëse:

1.1. nuk lajmëron organin kompetent mbi pranimin e të huajve të cilëve iu ofron shërbime të akomodimit apo të cilin e pranon për vizitë, paragrafi 4. i nenit 82 të këtij ligji;

1.2. nuk e lajmëron organin kompetent për pranimin ose trajtimin e të huajve, sipas paragrafëve 1. dhe 2. të nenit 82 të këtij ligji;

1.3. nuk e mban në mënyrën e duhur evidencën për të huajt të cilëve iu kanë ofruar shërbime ose nuk e njofton sipas afatit ministrinë përkatëse për shërbimet e ofruara për të huajt, sipas paragrafëve 1. dhe 3. të nenit 83 të këtij ligji;

1.4. personit zyrtar të ministrisë përkatëse nuk i mundëson qasje në dokumentet e evidencës për të huajt të cilëve iu ofron shërbime të akomodimit, paragrafi 3. i nenit 83 të këtij ligji.

2. Për kundërvajtje sipas nën-paragrafit 1.1., 1.2., 1.3. dhe 1.4. të paragrafit 1. të këtij neni mund të shqiptohet masa mbrojtëse ndalimi për kryerjen e veprimtarisë të personit juridik.

KREU XIII DISPOZITAT KALIMTARE DHE PËRFUNDIMTARE

Neni 93

Rrethanat për hyrje dhe qëndrim

1. Me rastin e vendosjes për hyrje ose qëndrim të të huajit, organet vendimmarrëse duhet t'i kenë parasysh rrethanat si në vijim:

1.1. ashpërsinë apo llojin e veprës së kryer kundër sigurisë dhe rendit publik nga i huaji apo nga anëtarët e familjes së tij, ose nga rreziku që vjen nga personi në fjalë;

1.2. marrëdhënien dhe natyrën e afërsisë së familjes së personit dhe kohëzgjatjen e qëndrimit të tij në Republikën e Kosovës dhe lidhjen sociale, kulturore dhe praninë e familjes së tij në shtetin e origjinës.

2. Vendimi për ta anuluar qëndrimin e përhershëm nuk duhet të merret bazuar vetëm në rrethanat ekonomike. Me rastin e marrjes së vendimit për anulimin e qëndrimit të përhershëm, organet duhet t'i kenë parasysh këto gjëra:

2.1. kohëzgjatja e deri atëherëshme e qëndrimit të tij në Republikën e Kosovës;

2.2. mosha e personit në fjalë;

2.3. pasojat e mundshme për personin apo anëtarët e familjes së tij;

2.4. lidhjet me Republikën e Kosovës ose mungesën e lidhjes së tij me shtetin e origjinës.

Neni 94 **Lajmërimi zyrtar**

Nëse i huaji nuk e informon organin kompetent për ndërrimin e adresës apo në adresën në të cilën është i lajmëruar nuk mund të gjendet, flet dërgesa e vendimit realizohet nëpërmjet shpalljes zyrtare dhe do të konsiderohet si e pranuar që nga data e publikimit të tij.

Neni 95 **Të drejtat e azilkërkuesve**

1. Të drejtat e të huajve që kërkojnë, ose është e arsyeshme të besohet se mund të kërkojnë, çfarëdo formë të mbrojtjes në Kosovë, duhet të përcaktohen në përputhje me dispozitat e Ligjit për azil.

2. Asnjë nga dispozitat e këtij ligji nuk duhet të interpretohet si anashkaluese e obligimeve të shtetit në kuadër të Konventës lidhur me statusin e refugjateve të vitit 1951, me Protokollin e vitit 1967 lidhur me statusin e refugjatëve.

Neni 96
Rregullat e aplikueshme deri në miratimin e rregulloreve të reja

1. Me kusht që të mos jenë në kundërshtim me këtë ligj dhe deri në shqyrtimin dhe miratimin e akteve nënligjore nga ministria ose propozuara nga ministritë përkatëse dhe të miratuara nga qeveria, udhëzimet administrative në vijim vazhdojnë të mbeten në fuqi:

1.1. Udhëzimi Administrativ nr. 18/2009-MPB për Fletudhëtimin për të Huajt;

1.2. Udhëzimi Administrativ nr. 01/2010-MPB për Themelimin e Komisionit Shqyrtues dhe të Komisionit për Ankesa;

1.3. Udhëzimi Administrativ nr. 02/2010-MPB për Përmbajtjen, Formën, Mënyrën e Dhënies dhe Anulimin e Lejes së Qëndrimit;

1.4. Udhëzimi Administrativ nr. 03/2010-MPB për Ndalimin e Hyrjes në Republikën e Kosovës;

1.5. Udhëzim Administrativ Nr. 19/2010 – MPB – për procedurat e lajmërimit dhe ç’lajmërimit të vendbanimit apo vendqëndrimit;

1.6. Udhëzim Administrativ Nr. 21/2010 – MPB – për lëshimin e vizave në pikat e kalimit kufitar;

1.7. Udhëzim Administrativ Nr. 22/2010 – MPB – për Lëshimin e Dokumenteve të Udhëtimit për të Huajt;

1.8. Udhëzim Administrativ Nr. 23/2010 – MPB – për Mirëmbajtjen dhe Menaxhimin e Regjistrave për të Huajt;

1.9. Udhëzim Administrativ nr. 31/2010 – MPB – për Letërnjoftim për të Huajt.

2. Sipas propozimit të Ministrisë përkatëse për Punë të Brendshme dhe Ministrisë përkatëse për Punë të Jashtme, Qeveria do të nxjerrë aktin nënligjor për:

2.1. mënyrën e lëshimit të dokumenteve të udhëtimit dhe vizave të huajve në misionet diplomatike respektivisht në zyrat e konsullare të Republikës së Kosovës jashtë vendit;

2.2. mënyrën e udhëheqjes së evidencës mbi lëshimin e dokumenteve të udhëtimit si dhe vizave të huajve në misionet diplomatike gjegjësisht në zyrat e konsullare të Republikës së Kosovës;

2.3. për formën dhe përmbajtjen e formularit për dhënien e vizave, formularit për letërnjoftime të posaçme, si dhe formularin e kërkesës për lëshimin e saj dhe mënyrën e mbajtjes së evidencës për vizat e lëshuara dhe letërnjoftimet si dhe çmimin e tyre.

Neni 97
Shfuqizimi

1. Ky ligj shfuqizon:

1.1. Ligjin nr. 03/L-126 për të Huajt;

1.2. Udhëzimi Administrativ nr. 19/2009-MPB për Dispozitat Ndëshkuese të Ligjit për të Huajt; dhe

1.3. Çdo dispozitë të legjislacionit që bie në kundërshtim me këtë ligj që ka të bëjë me të huajt.

Neni 98
Afatet për nxjerrjen e akteve nënligjore

Aktet nënligjore për zbatimin e këtij ligji nxirren në afat prej një (1) viti nga hyrja në fuqi e këtij ligji.

Neni 99
Hyrja në fuqi

Ky ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

Ligji Nr. 04/ L-069
21 dhjetor 2011

Kryetari i Kuvendit të Republikës së Kosovës,

Jakup KRASNIQI